

Loys, pere de saint Loys, son cousin germain, et de la a Tholouse et a Avignon ; esquelz lieux il acquist tres grande honneure et gloire, et fust merueilleusement prise et honore. Et, apres qu'il eust lasse tous les heretiques des lieux dessusdits, et que de toutes ses entreprinses fust venu a son intention, et que le royaume de France, par son moyen, fust en bonne paix et tranquillite, le roy saint Loys, a son nouvel advenement, le mena oultre mer, en la cite de Damiette, contre les infidelles et Turcs, où il moureust apres que ladite cite de Damiette fust prinse par les francoys, lan de grace mil deux cens cinquante, le vingt uniesme jour du moys de may.

Audit Humbert, connestable de France, succeda Guichard son filz lequel fut s^r de Beaujeu et espousa madame Blanche de Chaalon, fille de Messire Jehan conte de Chaalon. Le dit Guichard estait cousin remue de germain de Monsieur saint Loys roy de France. Toutes foys il mourust sans hoirs descendans de son corps. Il fust fort plainc et regrette de toute maniere de gens; car ce fut en son temps ung saige prince et de bonne conduite; parquoy ce fust une moult grande perte tant pour le royaume que pour son pays et parens. Il deceda de ce monde le neufviesme jour de mai lan de notre Seigneur Jesus Christ mil deux cens soixante cinq. Il fut de son temps connestable de France et fut enterre a notre dame de Belleville en ung tombeau que lui fait faire madite dame Blanche de Chaalon sa delaissee. Le quel est entre le grand autel dudit lieu de Belleville et de l'autel saint Pierre.

Le deuxieme filz de madite dame Sybille de Flandres fut appelle Guichard, et eust pour son partaige la seigneurerie de Montpeneyer. Et si eust ung filz nomme Humbert, lequel fust connestable de France après la mort du dessusdit Guichard son cousin germain. Et semblablement alla avec le roy saint Loys a Thunes et en tout le voyage d'oultre mer.